

MEMORIA XUSTIFICATIVA SOBRE O CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES E A UNIVERSIDADE DE SANTIAGO DE COMPOSTELA PARA A REALIZACIÓN DE PRÁCTICAS ACADÉMICAS EXTERNAS CURRICULARES OU EXTRACURRICULARES DO ALUMNADO DE MÁSTER EN TECNOLOXÍAS EN MARKETING E COMUNICACIÓN POLÍTICA

1.- O Decreto 42/2024, do 14 de abril, establece a estrutura orgánica da Xunta de Galicia e na súa disposición transitoria establece que a estrutura e función dos órganos superiores e de dirección existentes manterase mentres no se proceda ao desenvolvemento da estrutura contida no dito decreto, en relación co Decreto 117/2022, do 23 de xuño polo que se establece a estrutura orgánica da Vicepresidencia Segunda e consellería de Presidencia, Xustiza e Deportes (actual Consellería de Presidencia, Xustiza e Deportes). O Decreto 49/2024, do 22 de abril, fixa a estrutura orgánica das consellerías da Xunta de Galicia. A Consellería de Presidencia, Xustiza e Deportes, no exercicio das súas competencias, correspóndelle a elaboración, proposta e execución da política do Goberno galego en materia de deportes, xustiza, administración local, relacións institucionais e parlamentarias, emerxencias e interior, relacións exteriores e coa Unión Europea e mobilidade e entre os seus obxectivos está o de promover actuacións en colaboración con institucións sen fins de lucro como as universidades.

2.- O Real Decreto 592/2014, de 11 de xullo, que regula as prácticas académicas externas de estudantes universitarios, establece no seu artigo 8.1.a a posibilidade de que os estudantes matriculados en ensinanzas impartidas pola Universidade realicen prácticas académicas externas, que poderán ser curriculares ou extracurriculares. Pola súa parte, o Real Decreto 1791/2010, do 30 de decembro, polo que se aproba o Estatuto do Estudante, establece no seu art. 8.f o dereito dos estudantes á realización de prácticas curriculares ou extracurriculares, que poderán realizarse en entidades externas.

Os Estatutos da Universidade de Santiago de Compostela establecen, na súa disposición adicional primeira, que "a Universidade de Santiago de Compostela poderá contar coa colaboración de profesionais externos no desenvolvemento de actividades prácticas derivadas de convenios ou acordos con ela, para impartiren prácticas tuteladas externas, segundo o que se estableza nestes convenios, e procurará o adecuado recoñecemento desta colaboración". Así mesmo, no art. 51 f) indican que unha función das facultades e escolas é a promoción e implantación de medidas para a realización de prácticas externas.

A adecuación dos programas educativos ás necesidades do mundo laboral constitúe unha das preocupacións da Universidade de Santiago de Compostela (en adiante USC), de aí que sexa un dos obxectivos da USC o complementar a súa formación teórica mediante as prácticas en entidades que lles permite coñecer a realidade laboral.



3. Con data 26/10/2021 asinouse un convenio entre a entón Vicepresidencia Primeira e Consellería de Presidencia, Xustiza e Turismo e a Universidade de Santiago de Compostela para a realización de prácticas académicas externas curriculares ou extracurriculares do alumnado de titulacións de grao e máster universitario da Facultade de Ciencias Políticas e Sociais, nas instalacións da consellería. A vixencia era de dous anos.

Debido ao bo resultado da experiencia, rematada a vixencia do dito convenio, é de interese da USC promover a renovación do mesmo para a realización de prácticas académicas na titulación de Máster Universitario en Tecnoloxías en Márketing e Comunicación Política impartida nesa facultade, as cales xa foron desenvoltas en virtude do anterior convenio.

4.- Finalidade. Para os efectos sinalados, tense previsto formalizar coa Universidade de Santiago de Compostela o instrumento convencional anteriormente referido cunha vixencia de catro anos dende a súa sinatura e, en todo caso, polo tempo que duren as prácticas do alumnado, podendo prorrogarse de forma expresa para os seguintes catro anos de común acordo polas partes e en tanto non se denuncie expresamente como mínimo con tres meses de antelación.

5.- Obxecto. O convenio ten por obxecto establecer un programa para a realización de prácticas académicas externas dos alumnos da titulación de Máster Universitario en Tecnoloxías en Márketing e Comunicación Política impartida na Facultade de Ciencias Políticas e Sociais, nas instalacións da Consellería de Presidencia, Xustiza e Deportes, así como para aportar os seus expertos para aquela parte da docencia teórico-práctica especializada que fora precisa.

6.- A Consellería de Presidencia, Xustiza e Deportes considera necesario colaborar no sistema de formación práctica do alumnado da USC, ao entender que esta actividade pode resultar de grande interese para completar a formación dos futuros profesionais e facilitar a futura inserción laboral mediante a alternancia da súa formación teórica con prácticas externas.

7.- Financiamento. O presente convenio non comporta obrigas financeiras ou contraprestación económica para ningunha das partes.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, do 8 de novembro, de contratos do sector público, con independencia de que, ao abeiro do previsto no artigo 4 de dita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela, data da sinatura dixital
O secretario xeral técnico
Francisco Javier Abad Pardo

